

隱居通議

二



隱居通議卷八

詩歌三

律選

律詩始於唐。盛於唐。然合一代數十家。而選其精純高渺。首尾無瑕者。殆不滿百首。何其難也。劉長卿。杜牧。許渾。劉滄。實爲巨擘。極工而全美者。亦自有數。入宋則古文古詩。皆足方駕漢唐。惟律詩視唐益寡焉。蓋必雄麗婉活。默合宮徵。始可言律。而又必以格律爲主。乃善。儻止以七字成句。兩句作對。便謂之詩。而重滯擁腫。不協格調。恐於律法未合也。近歲鄉先生。謚公祐。妙選唐律數十首。詳加評注。以誨學者。大爲有益。

桂舟七言律摘

謚公祐。字自求。號桂舟。世居南豐之西。曰瞿邨。幼厭舉子業。不求仕。專志古學。參詩於贛詩人蒼山曾公原。一益之以學。遂青於藍。喜著書。有三傳朝宗。史漢韻紀。古書合轍。所作有桂舟歌咏。桂舟雜著。集中記序最佳。其論詩處。皆入妙品。筆力高峻。有史漢文氣。古體樂府俱善。而於律體尤精。唐律絕響三百年。公自出機軸。掃空凡馬。蒼山翁號當時大詩人。猶推讓出一頭地。識者謂律詩至公中興。略摘其佳句。爲世

所稱者列於左

兩表蜀天開日月三軍漢地出旌旗諸葛武侯

王侯蠶穴青青草鼓吹鼉廬焱焱鏜自歎

動地百年無桀跖後天一壽有顏曾同上

百年窗下棋千著萬事燈前酒一斟詠古

白髮古今天北極黃華宇宙客西風淵明

封濬九州堯舜禹典刑萬世契夔龍評詩後作

陶寫有時欣律熟去來無著證鍾分覽鏡

西風木葉吹秦晉春雨桃華送古今避秦

兩水夾城飄近遠萬山擁翠綠參差豐孤蓬

不知元祐今何日慨想僮翁過此時同上

爲惜舊時慈母線寧甘今夜隔簾霜寒夜思親

夢猶平昔醒來別憶到兒童事轉長同上

江山落日前朝夢風雨黃華太古心對菊

觀空觀化此憑欄會合人間景一團棋罷客隨流水散酒闌花帶夕陽看看花

飛雨隔愁橫笛後。殘鐙照夢落花前。雨後

詩到二南風化在。句流三謝語言工。評詩

中原一髮天涯夢。元祐孤臣海外歸。東坡

造物未嘗私化外。英雄何事老隆中。問天

看翻後夜月。回照夢憶前生地不同。同上

天地浮萍雲聚散。江山罨畫月西東。皆寓堂

地上斷無秦世草。山中猶讀漢時書。懷古

夢臨水月心先覺。看到霜空幻亦稀。晚眺

天開暝色雲千里。雨洗秋空月十分。覽鏡

止水不留前世景。夕陽空照古人心。春晚

花開笑語從雲散。天下英雄豈陸沈。同上

隔雲烽火山河舊。列土旌旗雨露深。邊事

層城樓櫓看如畫。三鎮軍民夢解圍。宋史

樹帶夕陽雅半集。蘊寒秋浦雁初來。感懷

交游雨過三生夢。今古風前酒一桮。同上

千驪過眼人何在。一笛穿雲水自橫。快閣和山谷。

宮燭驪山酒未醒。妖星賸賸弄青荧。三朝伐叛知謀略。萬國歸心服典刑。郭汾陽。

夢游碧落風偏急。望斷金精月正中。寄林芝山。

萬壑松風天鼓吹。四圍花月錦簾櫳。評詩。

風雨畫酣秦地闊。關河春夢楚雲低。春日次韻。

蕃漢盛衰霜葉夢。陳隋興廢露華秋。讀史。

聚火有蓮知佛性。衡門無雁見交情。春郊。

一颿秋水漁歌遠。半塔斜陽雁影高。古慶晚眺。

邑自亂來新鼓角。屋從兵後尙蓬蒿。同上。

落雁景翻秋宇迴。亂雅嘯帶夕陽飛。謁李中山。

蜀天過雨浮嵐翠。漢地連雲小麥黃。西捷。

城上烏烏知息戰。陳前笳鼓緩歸裝。將軍斗大黃金印。猶待先登縛鬼章。同上。

鳳城色映紅雲見。龍袞香飄紫氣浮。行都迎駕。

地勢尊嚴今上國。天王明聖此中興。吳山。

弦管入春波面醉。雲天開鏡畫中行。西湖。

潮回海北風偏壯。秋滿江南客未歸。京華感寓

宮大阿房行日月。關通函谷混車書。讀秦史

雁寒景落三山月。騎俊神通萬里城。送閩使

帝城煙冷江沱在。郿隄金多社稷危。賈似道

吳天北斗行宮在。漢節西風閒道歸。文相歸

雅翻漢月催黃髮。雁斷胡天想翠華。自和

燕雲海闊歸鴻杳。蜀漢城荒戍馬閒。黃葉

漢殿落花龍袞棄。周原荒棘虎營新。感事

短褐尙時吟杜曲。采芝何處問秦峯。暗投

晉墅風流棋局散。江東柱石酒壺傾。次韻

雁過大江風帖帖。雅嘯荒樹日悠悠。紀事

赤幟露光王漢地。錦帆波蕩帝隋舟。卽事

楚草澤深陳勝在。秦瓜地曠邵平閒。次韻

天開漢統玉巴蜀。雲從秦繇起沛豐。感事

向日不知今解老。他時應憶此何年。三月晦

萬國夢回秦月在千年事過蜀雲飛。聞鵲

六鼇傾側動乾坤國母巡荒護帝孫北極星辰臨草地西風觀闕臥花門。聞慈元歸信

南極大明秋氣迴西風吹夢泰階平。壽潭翁

西風客老雄心在泰古人稀俠骨香。次韻

梁有字題何歲月藏無經在亦香鐙。定寺

于山落木秋來客兩袖西風旦過僧。同上

昨日共吟今是夢少時輕別老翻愁。別友

天教向老逢春在詩且忘憂此命通。聽天

何事重來看明月不堪垂老向西風。寄友

風雨黃花秋興熟江湖歸路客愁輕。寄何清白

昨朝骨肉關情大今日平安過望多。亂後

歸來今夕歲云徂且共平安酒一壺浩劫定中逃得過舊愁空外看來無。歸來

五更歷轉花紅在萬里晴光草綠敷。同上

一日又從頭上過百年多在夢中行。正月二日

月明老樹吟風鶴露溼荒郊徧土梟。今日

事去尙時尋敗局。老來猶日讀何書。秋氣

術豈有靈能起死。夢從何處忍忘歸。悼亡

燕尙有情迎社到。蜨空無夢過時休。同上

壯日尙曾雲出岫。暮年偏怪海揚塵。丙戌立春

紫微星奠三階正。黃道天開萬象新。同上

梁燕未歸花尙在。杜鵑有恨月常孤。夢起

此情消遣終難去。無路追尋豈是愚。同上

天空日照陰霾伏。八表天開泰象同。自寬

禹甸草荒昏霧徧。漢宮花夢畫雲酣。次水邨

花柳晴光新態度。江湖春夢老英雄。自寬

日月任從愁裏過。客塵常向靜中參。次韻

歸櫂舞風鷗不下。愁筇吹月雁斜行。自感

集中詩如此者尙多。今姑采其膾炙人口者錄之。觀其妙趣天得。自成一派。不肯拾陳蹈故。而於清麗婉活中。有蒼勁沈鬱意。有似二劉者。有似杜黃者。律詩中興。非此翁而誰。

五言律攝

風雨低黃鵠。江湖老白鷗。聞笛

歌舞從兒女。艱難憶父兄。月夕

塞雲橫蜀棧。胡馬出巴陵。

白髮風前酒。黃花雨後鐙。聞邊報

月滿商山夜。風高漢殿秋。讀史

世情江水淡。心事海鷗知。寄友

巴雲秋景薄。漢月夜光寒。

克復歸神主。多才自不難。輿地志

玉花嘶徼外。翠輦過雲中。丙子

社稷新亭涕。山河禹貢書。同上

星辰天北戶。漢沔國西門。同上

馬悲仙仗過。雁入海門斜。戊寅

國被儒冠誤。如今尙忍言。雪霜昏日月。盜賊滿乾坤。有感

以上皆集中五言律句。公五律不多作。予少時從諸老閒。競誇風雨低黃鵠。與白髮風前酒二聯。以爲可

配少陵。今末俗淺識。殊無知者。

五言古擷

昔誰醒中夢。今獨夢中醒。萬綠水上漚。百歲花前景。
中年歎憂患。不及兒童歲。今兒機械多。反不如人意。
月行虛空閒。月影印在水。月落影還無。一笑人閒世。
地上有錢流。冥閒無半字。自作槁木看。靜閱滄江流。
江頭春水多。湯湯今復古。不載落花回。只載斜陽去。
胡笳明月夜。漢節秋風前。此士已骨朽。此名至今傳。
舊者今不見。今者舊不知。萬古明月在。千山黃雲飛。
以上皆桂舟集中五言古體佳句也。

七言古擷

公嘗登庾嶺觀梅。賦古體有曰。東郊獨行冰玉時。江左諸賢王謝起。若以比花花或宜。自不矜持花亦恥。
又曰。屈原離騷芳草徧。召南治世梅先見。皎如佩玉上清來。不敢班渠國風變。又曰。花今國在橫浦南。看
誰冰雪來同參。入南出南此時節。元祐名卿花底雪。骨香直到桑海翻。花尙永存香豈滅。若此者。皆發前
人之所未言。可謂獨步一世矣。

茂陵錢歌曰。茂陵秋草不如錢。老盡日光行宇宙。昭君曲有曰。世言如花人薄命。誰識如花入衛霍。只今

保塞願稱臣。鬢蟬奪却貂蟬勳。羯鼓催花曲。一聲金殿玉闌干。一曲馬嵬坡下土。夕陽空照古今愁。年年醉醒桃花雨。勸農日。曰。山花笑人人似醉。勸農文似天花墜。農今一柸回勸官。吏瘠民肥官有利。官休休。民休休。勸農文在牆壁頭。官此日。民此日。官酒三行官事畢。癸未元日。曰。黃葉枝頭又早春。紅花景裏多明日。任翻河漢風北來。終是乾坤日東出。以上七言古體中摘出。

樂府臯蘭行有曰。笳鼓宮商塞外歸。似此殊勛古難匹。後來渭上朝正月。尙憶祁連冢中骨。玉門關曰。後無關險無中士。大夜宜春狐晝舞。萬戶千門草綠深。蘆葉捲吹紅日暮。貳師城曰。莫將黷武議前朝。今日人思此奇絕。虞美人草曰。失道原不在陰陵。放逐義帝知亡形。西風所過皆殘滅。不據關險都彭城。楊妃出浴圖曰。霓裳風秋舞天半。舞到玉花飛石棧。三台四輔繞星垣。只一曲中知後患。風流天子悟轉圜。不見蜀山橫翠面。又曰。梨園曲譜韶音祕。響入馬嵬花委地。開花不再宮不花。天街草綠西風起。以上皆有議論。有氣骨。張籍王建不專美于唐也。

九臯吟彙摘句

近世吟人。工律如九臯陳公寧之宗道。亦自絕少。略摘於後。七言中有似唐者。然不及桂舟風骨也。

落日含兵氣。空山更晚風。有家音問絕。無處道途窮。

落日。

草樹深城郭。塵埃犯縉紳。古來皆有死。吾獨此時人。

牛歲。

故里人何處。空山日又斜。干戈今爾輩。天地此誰家。

故里。

未死終相見。無生底再逢。征衫今日淚。慈母在時縫。歸來。

多少艱難事。言言卒不窮。同上。

相思不相見。身在曷如無。望家管。

江闊乾坤壯。山長吳楚遙。錢唐。

漢軍鼙鼓動。蜀道雪山消。觀潮。

風景夢中天地老。江山畫外古今情。八月十五夜。

一年好處在今夕。每度圓時無此清。同上。

日月更無山障礙。乾坤惟有水周回。金山。

家在鄆州身隴右。弟居河濟妹鍾離。讀杜詩。

中興社稷兩天子。老死乾坤一拾遺。同上。

荒草連雲人拾燼。空山遺塔鬼吹鐙。常山觀後。

舟無可渡人難到。兵不能災地轉靈。青陽洞天。

深洞有龍雲氣黑。空山鳴鶴夜鐙青。同上。

江山那解將愁去。草木親曾見亂來。經蒼山人。

一林雲氣龍猶在。午夜松聲鶴自寒。仙子偶來成夢事。至今游客未嘗閒。姑山。

黃中通理似無物。天下橫行寧不烹。

九臯古體亦多佳者。旅懷曰。清波渺前灘。白鳥下寒渚。樵斧空山鳴。歸舟夕陽暮。去來風中人。明滅雲外樹。雙輪何時休。愁心此羈旅。此篇甚似蘇州也。送別一章曰。江邊出相送。君去我當反。裴回未忍還。孤颿夕陽遠。語短而意甚長。洗馬行曰。玉谿谿頭波綠玉。玉谿谿上沙金粟。曉營出馬五花雲。鳴榜齊首橋南浴。馬高如屋長如龍。四蹏如鐵聲如鐘。青芻幾束粟幾斗。繁汝貢汝爭奇功。編驥抹刷鱗色罷。黑面雄兒齊上馬。就中一馬不敢騎。云是將軍臨陳者。又曰。要知馬最於人厚。鞞鼓旌旗應如手。燕山雪重黃河深。功屬將軍馬何有。又有送戴石屏歸天台詩曰。天台四萬八千丈。一根直下寒銀浪。青蓮老子夜不眠。往往飛魂到其上。詩情不減流白雲。千載重見戴叔倫。蓮花峯下赤城洞。芒屨翻笑山中人。秋風孤篴八九尺。老面百摺賴銅色。田文席上摩吟髭。鵲立蒼苔煙雨黑。我家竹屋棲龍岡。夜擣孤月餐寒霜。醉騎白鹿軍峯下。一見贈我青瑤璫。南山臺前春正好。萬壑千崖清夢曉。蒼苔石磴撫闌干。往事飛鴻天亦笑。君今東首回身稿。我亦西去浚蒼蒼。截江橋南春水急。酒酣不記攀垂楊。軍峯江南最高處。我上峯頭望君去。歸時定入天台山。舉首雲閒一相顧。此篇雖語意微弱。而言語清峭。不染塵俗。可愛也。結意亦好。其題謝氏西谷曰。江東風流會稽伯。玉壺貯香傾琥珀。春風十里東山雲。一曲寒楸晚空碧。盤盤石磴紅泉仙。春草夢斷瑤池箋。蒙茸曲笠雨花溼。老屐踏損蒼苔錢。雙鸞翩翩跨元島。月白香魂翠山杳。玉蘭千載流芳馨。清風凌厲連紅曉。其送寧都陳令曰。梅花樓頭立晴雪。松葉亭根聽夜雨。鼯鼯息響月千山。桃李無言

春萬樹。凡此皆刻削清麗。香人齒頰。可以爲詩家之俊矣。

秋麓山雞愛景集

余初著通議時。嘗載吾叔父秋麓先生鏜。高年著作不倦。而余自覺江淹才盡。不能逮以爲媿。今先生謝世。倏閱八期。追懷悽愴。學者曾元伯。哀金刻其遺吟。而以絕句爲之首。蓋其古律體多。而絕句獨少。自成一家。不專宗唐也。摘其尤者如左。

公有觀儺古詩一篇絕佳。其辭曰。寒雲岑岑天四陰。畫堂燭影紅簾深。鼓聲淵淵管聲脆。鬼神變化供劇戲。金滢玉注始淙潺。眼前條已非人間。夜叉蓬頭鐵骨朵。赭衣藍面眼迸火。魑蜮罔象初蟬蛸。跪羊立豕相嚶嚶。紅裳姼女掩蕉扇。綠綬尋翁握蒲劍。翻筋踢斗臂膊寬。張頤吐舌脣吻乾。搖頭四顧百距躍。斂身千態萬舉索。青衫舞蹈忽屏營。彩雲揭帳森摩旌。紫衣金章獨據案。馬鬣字權兩披判。能言禍福不由天。躬履率越分愚賢。疾藜奮威小由服。由。勸勿切。鬼頭也。盤繆揚聲大鑿哭。白面使者竹篠鎗。自誇搜捕無遺藏。牛冠笄卷試閱檢。完冒肩戟光閃閃。五方點隊亂紛紜。何物老嫗縑襪熏。終有進士破鞮絳。嗜酒不悟鬼看覷。奮髯瞋目起嫫媿。衆邪一正將那何。披髮將畢飛一呖。風捲雲收鼓簫歇。夜闌四坐慘不怡。主人送客客盡悲。歸來桃菊坐深蘭。翠鴉黃狐猶在眼。自歌楚些大小招。坐久魂魄游消搖。會稽山中禹非死。鑄鼎息壤乃若此。又聞鬼姦多馮人。人姦馮鬼姦入神。明日冠裳好妝束。口畫通都人面目。此篇筆力奇甚。可以補缺古人也。

七言律不多，摘其佳句於後。

孔曾有道官天下，韓柳無文世子孫。甲申遷居

邨橋日落市聲散，山路月明人語歸。郭中宿

月下有聞思望帝，山中無曲舞胎仙。和韻

版橋雨過秋苔滑，邨碓寒吹暴稻香。懷友

尊前能是幾時客，山下已成千古墳。出郊懷感

柳條風慢天初煖，花影晴光地亦香。桃源

故人皆死誰爲佛，老我猶生卽是仙。夜坐

草墮水流檐佩響，松梢月冷露珠圓。同上

幾番雨過山仍在，獨望人間鶴未歸。菊潭故居

公忍貧著書，垂死不廢。所著有聖門言行錄，考覈浩博，總會精實，諸公協力以刊，而不及竟。六經之餘，釋

老書無不通貫。所作科教之文，尤爲入妙。琳宮梵宇，得其一篇者，俱謂足以名世。具在別錄。

山谷諸作

山谷翁書摩崖碑後，題老杜浣花醉圖，皆精深有議論，嚴整有格律。二篇正堪作對。嘗欲令善畫者圖作兩屏，錄二詩其上，每當讀詩餘閒，酒酣興發，朗誦數過，以舒吟懷，亦一快也。

山谷題榮州祖元大師此君軒云。程嬰杵臼立孤難。伯夷叔齊采薇瘠。形容絕妙。後有作者。何以加之。左氏載嬰事甚略。得太史公鉅筆鴻文。乃始發揮其忠節。反覆讀之。百世之下。猶爲哀傷。真足以愧天下之爲臣不忠者。然韓厥之在當時。微有觀望。幸而嬰事得成。厥與其功。不然。十五年間。多少事節。萬一嬰志不遂。厥其能爲武立赤幟耶。此堂孫先生瑞。南豐先達名儒也。嘗謂余曰。山谷作詩。有押韻險處。妙不可言。如東坡效庭堅體。詩云。我詩如曹鄴。淺陋不成邦。公如大國楚。吞五湖三江。赤壁風月笛。玉堂雲霧窗。句法提一律。堅城受我降。只此一降字。他人如何押到此。奇健之氣。拂拂意表。

古今咏淵明者多矣。獨山谷深入閫奧。其懷陶令之詩曰。潛魚願深渺。淵明無由逃。鼓澤當此時。沈冥一世豪。司馬寒如灰。禮樂卯金刀。歲晚以字行。更始號元亮。淒其望諸葛。忼慨猶漢相。時無益州牧。指揮用諸將。平生本朝心。歲月閱江浪。空餘詩語工。落筆九天上。向來非無人。此友獨可尙。屬余剛制酒。無用酌。栢盎欲招千載魂。斯文或宜當。此詩允謂得淵明之心者。世以陶公爲幽人隱士。非也。身逢禪代。悲憤不自勝。欲如孔明紹休漢室。思致中興。而世無英雄如昭烈者。可與興復。既不可爲。則姑自放於詩酒而已。晚年以字爲名。而別更其字曰元亮。景慕孔明。意可概見。或者但見其棄官彭澤。歸逸柴桑。遂以幽隱待之。誤矣。

桃李春風一栢酒。江湖夜雨十年鐙。

寄黃幾復。

萬里書來兒女夢。十月山行冰雪深。

寄上叔父夷仲。

弓刀陌上望行色。兒女燈前語夜深。

同上其三。

風光錯綜天經緯。草木文章帝杼機。

次韻雨絲雲鶴。

兩宮無事安磐石。萬國歸心有老臣。

同子瞻韻和趙伯充園練。

落木千山天遠大。激江一道月分明。

快閣。

家移四壁書侵坐。馬瘦三山葉擁門。

次韻宋楸宗儼居甘泉坊雪後書懷。

笙歌忽把二天酒。風雨猶驚三峽濤。

次韻答清江主簿趙彥成。

萬竿苦竹旌旗卷。一部鳴鼉鼓吹休。

次韻黃份老晚游池亭其二。

千林風雨鶯求友。萬里雲天雁斷行。

宜陽別元明用鴈字韻。

爭名朝市魚千里。蓋世功名黍一炊。

五更歸夢三千里。一日思親十二時。

蓋世功名棋一局。藏山文字紙千張。

語言少味無阿堵。冰雪相看有此君。

心游萬里不知遠。身與一枰相對閒。

世態已更千變盡。心原不受一塵侵。

寒蛩催織月籠秋。獨雁叫羣天拍水。

聽宋儒摘阮歌。